



Sesida dals

20 d'avust 2024

Communitgà ils

21 d'avust 2024

Protocol nr.

669/2024

### **Incumbensa Wilhelm**

concernent la finanziaziun dals ospitals dal Grischun per segirar in provediment da sanadad decentral

### **Resposta da la Regenza**

Sco ch'i vegn menziunà en l'incumbensa, è la situaziun finanziaria dals ospitals grischuns sa pegiurada considerablmain ils ultims onns. La gronda part dals ospitals sto nudar pli e pli grondas perditas en il quint da gestiun (cash-flow negativ) e n'è perquai er betg pli buna da finanziair las investiziuns ch'èn necessarias per mantegnair, per renovar e per cumplettrar las immobiglias, la tecnica medicinala, ils instruments ed apparats diagnostics sco er ils systems d'infurmaziun clinica. L'agen chapital dals ospitals grischuns è praticamain consumà, perquai ch'el è vegnì duvrà per cuvrir las perditas dal manaschi d'ospital. En vista al fatg che la dignitad da credit dals ospitals manca, èsi fitg difficil d'emprestar chapital ester sin il martgà da chapital per garantir la liquiditad.

La politica vul in provediment da sanadad decentral da la populaziun. Pervia dal svilup finanziel disfavouravel dals ospitals grischuns è quest provediment decentral periclità. Ins sto temair che singuls ospitals vegnian serrads. Sche quai fiss il cas, avess quai consequenzas negativas sin l'attractivitat dals abitadis decentrals sco er sin la purschida turistica. Correspudentamain datti senza dubi in basegn d'agir dal maun public. En quest connex stoi vegnir menziunà, che las regions da provediment da la sanadad resp. lur vischnancas pon – tras lur dretg da cundecisiun – influenzar considerablmain la situaziun finanziaria da l'ospital respectiv. Correspudentamain èsi en emprima lingua chausa da quellas da garantir il manaschi da lur ospital. Tuttina vesa il chantun la necessitad da prestar svelt agid.

Per sustegnair finanzielmain ils ospitals vegn la Regenza a proponer al Cussegl grond d'augmentar considerablmain la contribuziun per las prestaziuns da basa

fixas en il preventiv 2025, quai en il rom da las contribuziuns als ospitals per prestaziuns d'utilitad publica. Uschia tegna ella er quint da la dumonda da la Cumissiun per sanadad e fatgs socials (CSF) concernent l'examinaziun da las contribuziuns dal chantun e da las vischnancas als ospitals publics per prestaziuns d'utilitad publica ch'è vegnida acceptada dal Cussegl grond, e plinavant dal resultat dal rapport extern ch'è vegnì fatg suenter l'examinaziun.

Sco ulteriura mesira vegn la Regenza a suttametter bainbaud al Cussegl grond in'adattaziun da la Lescha per promover la tgira da persunas malsaunas e l'assistenza da persunas attempadas e da persunas che basegnan tgira (Lescha per promover la tgira da persunas malsaunas, LTM; DG 506.000). En il rom da la revisiun parziala planisada da la Lescha per promover la tgira da persunas malsaunas duain vegnir stgaffids ils instruments che permettian da prestar en cas motivads ulteriurs sustegns finansials als ospitals publics, quai cuntrari a la regulaziun vertenta.

Cun l'adattaziun planisada da la Lescha per promover la tgira da persunas malsaunas duai per exempel vegnir stgaffida la basa legala che permetta a la Regenza da conceder – suenter avair tadlà las vischnancas da la regiun da provediment da la sanadad respectiva – emprests als ospitals publics per dumagnar periodas da crisa finansialas. Cun las mesiras da sanaziun duain ils ospitals pertutgads puspè cuntanscher in'atgna finanziaziun suffizienta. La concessiun dals emprests duai vegnir colliada – sin il stgalim da la lescha e da l'ordinaziun – cun cundiziuns e pretensiuns che ston anc vegnir definidas.

Cun questas mesiras duain vegnir stgaffidas – conform a questa incumbensa – las basas finansialas, per ch'ils ospitals publics possian porscher er en l'avegnir in provediment medicinal da basa en las regiuns da provediment da la sanadad.

Sa basond sin questas explicaziuns propona la Regenza al Cussegl grond d'acceptar l'incumbensa qua avant maun.



En num da la Regenza  
Il president:

Dr. Jon Domenic Parolini

Il cancellier:

Daniel Spadin